

SENZA CUNORTU

(alla mamma di Antonino Via)

‘Na matri comu trova lu cunortu
di perdi a so figghiu picciutteddu?!
Nun c’è palori e mancu c’è cunfortu,
nun c’è la paci ‘nta lu ciriveddu.

E penza di quann’era nutricheddu,
di dintra ‘nta la culla chi chiancia,
dicennucci: “Stai bonu figghiu beddu
chi c’è la mamma cca vicinu a tia.”

E penza a tutti quanti li prugetti
chi avia pinzatu pi quann’era granni,
a tutti li cunsigghi chi ci detti,
a li so’ sacrifici e li so’ affanni.

Sicuru, pi ‘na matri ‘un c’è cunortu,
nun trova mai la so rassegnazioni;
puru si sapi chi anchi dopu mortu
di lu Signuri teni prutizioni.

Ma chisti su’ cristiani eccezionali
mannati ‘n menzu a niatri a fari ‘mprisi;
di vivi sunnù ancili senza ali
e ora lu Signuri ci li misi.

2008

L'EMIGRANTI

Si parti afflittu e l'occhi lacrimusi
cu lu bigliettu pi la sula juta;
'nta la valigia quattru cosi sfusi
pi jiri 'nta 'dda terra scanusciuta.

“Ti lassu, paisi meu, lassu lu cori,
pirduna lu piccatu di ‘stu figghiu”
-ci dici sigghiuzzannu ‘sti palori-
“Ti giuru! Un jornu vegnu e mi lu pigghiu!”

Ma prima di ‘mbarcàrisi la vasa
'dda terra chi lassau a malincori,
saluta li so' amici, la so casa
e dintra d'iddu l'alligrìa ci mori.

“Eu mi n'hâ jiri, fazzu 'sta fuddìa!
Lu me avviniri cca nun l'attruvavi;
si fazzu chistu 'a curpa è sulu mia,
nun m'abbastava soccu tu mi davi!

E quannu chi si trova a la strania
ci pari 'n autru munnu veramenti
e penza, si fa nervi e poi smania:
“Ci campu? Ci resistu 'nta 'st'ambienti?!”

Ci fannu forza sulu li ricordi,
la vuluntá di vinciri 'sta vasa,
lu 'ntentu a guadagnari tanti sordi
e lu pinzeri sempri a la so casa...

2007

LA VUCIDDA

Di nichi nun facemu chi sunnari,
la fantasia è la nostra granni amica;
lu munnu? Rosi e ciuri d'odurari,
nun canuscemu scanti, né fatica.

Nun c'è superba e mancu gilusia,
nun c'è tristizza e mancu prisunzioni;
nni teni stritti stritti l'alligrìa,
nni basta picca e c'è sudisfazioni.

Di granni 'nveci 'un semu mai cuntenti,
nun apprizzamu chiù soccu è ch' avemu,
la bramusia nni rùsica la menti,
'dda vuci dintra a niatri 'un 'a sintemu.

Li ciuri 'un fannu chiù lu so profumu,
nun sannu dari chiù li beddi frutti;
lu ciàuru di la rosa? Tuttu fumu,
la fantasia si trova l'ali rutti.

Intantu, 'dda vucidda dintra a niatri
nni dici: "Attenta a mia, nun ti scantari!
Nun fari sempri, comu fannu l'âtri,
si tu m'ascuti, torni arré a sunnari...

Picchi mi teni nchiusu, carciratu?
Ti pari vriogna a fàrimi affacciari?
Si tu mi duni anticchia d' 'u to ciatu
la fantasia ritorna arré a vulari.

Nun vidi chiù li spini 'nta li rosi,
li ciuri fannu arré lu so profumu;
migghiura la to vita e tanti cosi
e li to' sonni 'un si ni vannu 'n fumu!.."



SCORCIATOIA →

← VITA

?

RICCHEZZA →

← FELICITA'

POTERE →

← AMORE

Piero Inconza

LI BARBUNA

Jittàti longhi ‘n capu ‘na panchina,
vistuti cu li fogghi di giornali,
agghiornanu aggragnati la matina,
pi stufa sulamenti li so’ armali.

E c’è cu’ li talia comu rifiuti,
cristiani ch’ ‘un su’ degni di campari,
negànnuci limosina e l’aiuti
o ‘na palora chi pò cunzulari.

Si fussimu cristiani veramenti,
cu anticchia di pietà dintra lu cori,
avissimu a pinzari chi ‘sta genti
nun havi a nuddu e abbannunata mori.

Inveci li taliamu malamenti
e nun sapemu mancu li ragioni
picchè s’arridderu senza nenti
pirdennu dignità comu pirsuni.

E càmpanu la vita strati strati
luttannu cu lu stentu e lu duluri,
sapennu chi di tutti su’ scurdati,
spirannu ch’ ‘un s’ ‘i scorda lu Signuri.

2007

LI VECCHI

Quannu ch'era nicareddu
quantu cosi nun sapìa,
si 'ncuntrava un vicchiareddu
eu pigghiava e lu sfuttìa.

Mi siddiava d'attintari
li cunsigghi chi mi dava,
mi vinìa d'abbaragghiari
e l'aricchi m'attuppava.

Si di nichì s'attintassi
li cunsigghi di sti saggi,
'nta li sbagghi 'un si 'ncagghiassi,
si evitassiru disaggi.

Lu picciottu pi natura
-chi si senti già arrivatu-
di 'stu beni nun si cura,
chi spirienza 'un ha pigghiatu.

E però quannu va duna
cu la testa a qualchi agnuni,
si ni penti e si n'adduna
chi 'ddu vecchìu avìa ragiuni.

Si tu si' di chiddi sperti,
quannu vidi un vicchiareddu,
statti cu l'aricchi aperti
si ti cunta un fattareddu.

Picchì sutta 'a testa bianca
e la peddi arrapacchiata,
c'è spiriezza chi svalanca
di 'na vita già campata.

DIMMILLU TU...

“Papà!” - Ci dumannava eu a me patri -
“picchè si nasci, crisci, mori; allura
cu’ fu chi veramenti fici a niatri?
Fu lu Signuri oppuru la natura?”

Ricordu la so facci, ‘dd’espressioni,
si ci liggìa: “Ma cca di dunnì pigghiu?!”
Eu lu capìa e canciava discursioni:
“A mia m’abbasta d’essiri to figghiu...”

Criscivi cu ‘stu dubbiu ‘nta la testa,
lu portu appressu di quann’era nicu
ma a ‘stu quisitu nun c’è soluzioni.

Mi scantu si me figghiu fa richiesta
a ‘sta dumanna, eu soccu ci dicu?!
Pinzannuci mi veni ‘a cunfusioni...

2007

SOCCU CUNTA VERAMENTI

Curremu sempri e nun pinzamu mai
soccu è pi nui chi cunta veramenti,
nni cunvincemu chi li nostri guai
su' grossi, chiú di chiddi d'otra genti.

E li pinzeri sempri di li sordi,
pi niatri su' lu beni chiú 'mpurtanti,
la testa china di 'sti cosi lordi
e di cuscenza sempri chiú vacanti.

Sicunnu mia, la cosa chiú speciali
-e chistu è un fattu chi nun si discuti-
nun su' li sordi chiddu chi è essenziali;
lu beni chiú priziusu è la saluti.

2007

A ME SOGGIRU

...E quannu poi trasivi a la so casa
sinceramenti mi scantava un pocu
“lu sacciu chi pi tia me figghia sfasa
però tu d’idda ‘un ti pigghiari jocu”.

Pi iddu c’era sulu la famigghia
e appressu sulamenti lu travagghiu
“si tu pigghi pi fissa a ‘sta me figghia
ti scacciu ‘a testa comu lu scarvagghiu!”

“Li me’ ‘ntinzioni sunnu veru boni,
nun sugnu cca pi fari ‘u scimunitu,
si mi duni la to binidizioni
vulissi addivintari lu so zitu.”

Mi vulia beni e nun mi lu dicia
faccia pi finta ‘u soggiru siveru
di jornu ‘n jornu la stima criscia,
avia un sicunnu patri pi diveru.

Ma quantu mi fa mali ‘un sacciu diri!
-pi stari zitu assai e pi babbjari-
ad iddu nun ci detti lu piaciri
di vidiri a so figghia maritari.

Me soggiru cristianu d’eccellenza
pi mia lu puntu di riferimentu
p’un mali tintu arridduciu ‘na lenza
e mai un accennu a cédiri, un lamentu...

Ma ‘n’altra cosa smaciria lu cori
sapiddu si capiu tutti li peni
ch’ ‘un mi firavi a diri ‘sti palori:
“me soggiru ti vogghiu veru beni!”

Però ci criu, nun sunnu cosi strani,
ni sugnu certu chi iddu lu talia
‘stu jennaru chiamatu “ncagghia cani”⁽¹⁾
e chi pruteggi la famigghia mia.

2007

⁽¹⁾ modo scherzoso con il quale mi chiamava.

LA MITITURA

Me nonnu mi cuntava chi ‘nta giugnu
‘n campagna si faciá la mititura,
lu saccu cu lu pani e fáuci ‘n pugnu
partia prima d’ ‘u sulí, a la friscùra.

Ed arrivava ‘nta lu siminatu
chi ancora si vidía e si svidía;
a fari lustru un mantu scunfinatu
cu l’oru di la spica chi lucía.

Ognunu travagghiava a lu so antu,
li spichi chi caríanu comu nenti;
lu capuspata accumulava un cantu:
l’ancinu, liama e fáuci li strumenti.

‘Stu cantu si sintia pi migghia e migghia
di ‘st’omini adduvati mititura,
chi pi purtari pani a la famigghia
la schina rutta e china di sudura.

E quannu chi lu sulí stracuddava,
finia la mititura e lu cantári;
la mogghi d’ ‘u patruni li chiamava:
avìa arrivatu l’ura di manciari!

Ma la jurnata ancora ‘un era lesta,
jimenti misi pronti pi firriari,
lu capizzuni e lu tistali ‘n testa
chi c’era lu furmentu di cacciari.

Si 'ncuminciava arrè cu 'n autru cantu
e si prijava chi ciusciassi ventu;
la spica lamintava lu so chiantu
e poi assummava tuttu lu furmentu.

Finìa la so jurnata 'u mitituri,
a la so casa poi facià ritornu;
lu tempu d'asciucari lu suduri
chi cuminciava arrè pi 'n autru jornu.

2008

LA COSA CHIÙ PUTENTI

Lu sapiti qual è la putenza
la chiù forti chi existi a lu munnu?
Riflittitici e jitici 'n funnu:
nun è bumma o prodottu di scenza.

È 'na cosa pi veru speciali
- 'ncarnazioni di vera 'nnuccenza -
havi forza, ma no priputenza,
nun canusci minzogna, nè mali.

Sapi smòviri tutti li genti
cori boni e carnazza chiù dura,
quannu dici di sì 'sta criatura
è chiù forti di chiddi putenti.

E viremma lu nostru Signuri
- comu esempiu di la so grannizza -
si sirviu di 'sta granni ricchezza,
nni mannàu a Gesù ridinturi.

Cari amici è pi veru accussì,
'sta putenza su' li picciriddi!
Ed ogni omu davanti a 'sti stiddi
arrimodda e ci dici di sì.

2008